

四庫全書

史部

欽定四庫全書

史部

蜀中廣記卷九十六至八

詳校官編修<sub>臣</sub>翟 槐

編修<sub>臣</sub>程嘉謨覆勘

總校官庶吉士<sub>臣</sub>何思鈞

校對官學正<sub>臣</sub>陳 木

謄錄監生<sub>臣</sub>曹錫爵

欽定四庫全書

蜀中廣記卷九十六

明 曹學佺 撰

著作記第六

地理志部

山海經十八卷

吳越春秋曰禹南巡登南岳得金簡玉字通水之理遂  
行四瀆所至使益疏而記之名山海經

地理指掌圖一卷

陳氏曰蜀人稅安禮撰元符中欲上之朝未及而卒書肆所刊皆不著名書亦頗闕不備此蜀本有涪右任慥序言之頗詳

輿地圖十六卷

陳氏曰金華王象之撰輿地紀勝逐州為圖逐路為卷其搜求亦勤至四蜀諸郡尤詳其兄觀之漕夔門時所得也眉山李說齋季允為之序

蜀紀

隋經籍志云漢揚雄撰載蠶叢以前洪荒之事下迄西漢有本紀有傳常璩李膺多引用之

蜀都賦

亦雄撰北齊司馬膺之註今無全篇僅存者執文類聚所載一段耳

蜀記

後漢廣漢李尤伯仁撰太平御覽引之

鄉俗記

後漢漢中趙寧撰華陽國志蜀守陳留高朕續文翁之後雅播文教太尉趙公瑤初為九卿適子寧還蜀朕命為文學撰鄉俗記

三巴記 巴中異物志

並蜀漢譙周撰水經注寰宇記多引用之

本蜀論

蜀漢光祿大夫來敏撰鄠道元注水經引之

陳術益部耆舊傳

蜀志術字申伯漢中人博學多聞位歷三郡太守又著  
釋問七篇 臨邛鄭厘伯邑亦作者耆舊傳

陳壽益部耆舊傳十篇

王獻之與人書益部耆舊傳今送想催驅寫取了慎不  
可過淹留 常寬續耆舊作梁益篇又作後賢傳

華陽國志十二卷

晉常璩撰自序曰巴蜀厥初開國載在書籍或因文緯

或見史記久遠隱沒實多疎畧及周之世侯伯擅威雖與牧野之師希同盟要之會而秦資其富用兼天下漢祖階之奄有四海梁益及晉分益為寧司馬相如莊君平揚子雲陽成子玄鄭伯邑尹彭城譙常侍任給事等各集傳記以作本紀略舉其隅其次聖稱賢仁人志士言為世範行為表則者名挂史錄而陳君承祚別為耆舊始漢及魏煥乎可觀然三州土地不復悉載地理志頗言山水歷代傳久郡縣分建地名改易於以居然辨



物知方猶未詳備于時漢晉方隆官司星列提封圖簿  
歲集司空故人君學士蔭高堂翳帷幙足綜物土不必  
待本紀矣曩遭厄運函夏滔堙李氏據蜀兵連戰結三  
州傾墜生民殲盡府庭化為狐狸之窟城郭蔚為熊羆  
之宿宅遊雉鹿田棲虎豹平原鮮麥黍之苗千里茂雞  
狗之響邱城蕪邑莫有名者嗟乎三州近為荒裔桑梓  
之域曠為長野反側惟之心若焚灼懼益遐棄城隍靡  
聞迺考諸舊紀先宿所傳并南裔志驗以漢書取其近

是及自所聞以著斯篇又采公孫述蜀書及咸熙以來  
喪亂之事約取耆舊士女英彥肇自開闢終乎永和三  
年凡十篇號曰華陽國志夫書契有五善達道義章法  
戒通古今表功勲而後旌賢能恨璩才短少無遠及不  
早援翰執素廣訪博咨流離困瘵方資腐帛於顛墻之  
下求餘光於灰塵之中刪減者多故有所闕猶愈於遺  
忘焉蜀紀言三皇乘祗車出谷口秦宓曰今之斜谷也  
及武王伐紂蜀亦從行史記周貞王之十六年秦厲公

城南鄭此谷道之通久矣而說者以為蜀王因石牛始  
通不然也本紀既以炳明而世俗間橫有為蜀傳者言  
蜀王蠶叢之間周迴三千歲又云荆人鼈靈死屍化西  
土後為蜀帝周葺宏之血變成碧珠杜宇之魄化為子  
鵲又言蜀椎髻左衽未知書文翁始知書學按蜀紀帝  
居房心決事參伐則蜀分野言蜀在帝議政之方  
帝不議政則王氣流於西故周失紀綱而蜀先王七國  
皆王蜀又稱帝此則蠶叢自王杜宇自帝皆周之叔世

安得三千歲且太素資始有生必死死終物也自古以來未聞死者能更生當世或遇有之則為怪異子所不言況能為帝王乎碧珠出不一處地之相距動數千里一人之血豈能致此鵬鳥今云是雋或曰雋周四海有之何必在蜀昔唐帝萬國時雍虞舜光宅八表大禹功濟九州后稷封殖天下井田之制庠序之教由來遠矣孔子曰述而不作信而好古竊比於我老彭則彭祖本生蜀為殷太史夫人為國史作為聖則仙自上世見稱

在昔及周之末服事于秦首為郡縣雖濱戎夷亦有冠  
冕故蜀紀曰大人之鄉方大之國也至于漢興反當荒  
服而無書學乎漢書郡國之有文學因文翁始若然翁  
以前齊魯當無文學哉漢末時漢中祝元靈性滑稽用  
州牧劉焉談調之末與蜀士燕胥聊著翰墨當時以為  
極歡後人有以為惑恐此之類必起于元靈之由也惟  
智者辨其不然幸也綜其理數或以為西土嶮固襟帶  
易守世亂先違道治後服若吳楚然故逋逃必萃奸雄

闕觀蓋帝王者統天理物必居土中德膺命運非可資  
能恃險以干常亂紀雖饕竊名號終於絕宗殄祀何者  
天命不可以詐詭而邀神器不可以僥倖而取也是以  
四岳三塗陽城太室九州之險而不一姓冀之北土馬  
之所產古無興國夫恃險憑危不階歷數而能傳國垂  
世所未有也故公孫劉氏以敗於前而諸李踵之覆亡  
於後天人之際存亡之術可以為永鑒也干運犯歷破  
家喪國可以為京觀也今齊之國志貫之一揆同見不

臣所以防狂狡杜奸萌以崇春秋敗絕之道也而顯賢能著治亂亦以為獎勸也

晉孫盛蜀世譜

裴松之註三國志引之

巴蜀志

晉袁休明撰其畧云高山嵯峨巖石磊落傾側縈迴下臨峭壑行者攀緣牽援帶索全書不傳此數語見酈道元水經注亦碎金殘璧也

傅玄蜀都賦

玄字休奕北地泥陽人博學善屬文舉秀才晉武受禪  
以玄為諫官遷侍中司隸校尉卒追封清泉侯所著蜀  
都賦初學記多採之

左思蜀都賦

思字太冲作三都賦載筆自隨十年乃就蜀其一也其  
事物多得之張載載父收為蜀郡太守隨之任所作有  
劍閣銘及成都白菟樓詩



補闕蜀都賦

王逸少與周益州書云省疏具悉彼土山川之奇故知  
揚雄左太冲蜀都賦為不備宋蒼溪嚴大猷因之作補  
闕蜀都賦

辨蜀都賦

宋王騰著序略云予讀左思蜀都賦見其薄蜀陋吳諠  
魏以諛晉之君臣苟售一時之聲價而滅天下之忠義  
甚矣原思之詞似欲尊正統而黜偏方然不顧正氣之

淪溺乃知蜀之被枉其所由來者豈朝夕哉故作辨蜀都賦以申蜀人之憤氣其商略土風採摭人物不該治亂興衰之變邪正是非之理者不在鋪列之限

益州記二卷

梁太僕卿涪城李膺公輔撰時為本州別駕樂史寰宇記常引用之按公輔一作公侑先是譙周任豫劉欣期各有益州記散見類書

段氏遊蜀記錦里新聞三卷

俱唐段成式著見寰宇記及宋史經籍志

唐鄭曄蜀記二卷

陳振孫曰雜記蜀事人物古跡寺觀之屬人代未詳按蜀志補罅以曄為成都人復著有天寶西幸略云

元澄蜀記一卷

出宋史新編未詳人代

唐盧求成都記五卷

序曰蜀國自秦始通秦遺蜀王五美女蜀亦遣五丁迎

之到梓潼見一大蛇入山穴中一人掣其尾不能得五人相助大呼拽之山崩五丁及秦女皆死惠王遂遣張儀司馬錯從石牛道滅蜀因封公子通為蜀侯以陳莊為相置巴蜀郡遷秦人萬家實之民始能秦言以蜀令張若為太守前時蜀王開明尚納美女為妃蓋五都山之精也及死葬于城西北遣五丁擔其本山之土以為塚今有二石尚存古老言五丁擔土擔也陳莊既為秦公子相數年遂謀反殺秦公子秦伐蜀誅莊封子惲為

蜀侯惲後母誣惲有罪賜劍自殺蜀人以其冤因為立祠又封子綰為蜀侯後復疑綰反誅死自此但置守而已後以李冰為蜀守冰始鑿三江引水以行舟楫岷山多梓栢大竹坐致材木又溉水稻田於是沃野千里號為陸海復置綿洛二水用便溉灌作石犀五以厭毒蛟命曰犀牛後更為耕牛二又作三石人立水中冰非常人也與江神約曰水竭不致足盛不沒肩大鑿巖崖通沫水導江之龍大怒冰乃持刀入水與龍鬪龍死遂無

水害迄今蒙利蜀人稱郫繁為膏腴綿洛為浸沃云昭  
襄王時又有白虎為患意廩君之魂也歷四郡傷千二  
百人王乃募能殺之者邑萬家金帛稱是巴夷胸忍廖  
中藥何謝作白的弩於高樓瞰而射之死王嫌其夷人  
乃刻石復頃田不租十妻不數傷人不論殺人不死與  
之盟曰秦人犯夷輸黃龍一雙夷人犯秦償清酒一鍾  
其人安之遂號白虎夷其族又有濮賓賓尤武勇居渝  
水夾水以居為漢高祖前鋒陷陣善舞巴與蜀代為仇

雋蜀嘗封弟葭萌於漢中號苴侯命其邑曰葭萌至漢  
高六年始分置廣漢郡高后城樊道開青衣文帝未以  
廬江文翁為郡守穿湔油口溉田千七百頃立文學選  
吏子弟皆就學令俊乂之士張叔等十八人東詣博士  
受七經還以教授於是岷絡之地學比齊魯孝景帝嘉  
歎遣天下郡國皆立文學自文翁始也文翁明天文災  
異後以博士徵至侍中揚州刺史孝武帝置四部都尉  
俾立十八郭於是郡縣多城觀矣又分牂柯置益州是

為南益州宣帝地節三年穿臨邛蒲鹽井二十置鹽鐵  
官自漢興至哀平牧守仁賢宣德立教英偉命代之士  
其出如林璽書東帛交馳於梁益之地矣雖魯之洙泗  
齊之稷下未足多也且漢徵八士蜀預其四高帝分蜀  
郡北鄙置廣漢武帝分南鄙為犍為遂有三蜀之號王  
莽改郡守為帥正以蜀郡為導江公孫述為帥正治臨  
邛述僭號後漢光武帝滅述還為蜀郡順帝即位復為  
益州郡名依舊州治大城郡治少城靈帝末以劉焉為



牧及卒子璋偽嗣建安十九年璋迎漢左將軍劉備至  
遂滅璋稱帝繼漢號稱先主治成都魏末司馬昭平蜀  
復為益州晉受魏禪以州領郡武帝末以成都為國封  
子穎為其王後賈人李雄僭稱王晉穆帝永和初遣桓  
溫滅之復為蜀郡譙縱反安帝命朱齡石討平之至梁  
分益州更置南北二益州以武陵王紀為刺史紀僭帝  
號領兵東下為湘東王所殺後魏廢帝前二年尉遲迥  
定益州置總管後迥舉義旗不受代為隋主堅所戮

按史

迎無舉義旗事恐是隋文帝若據益州不受代則王謙也隋開皇元年廢總管置行

臺以蜀王秀為西南道行臺尚書令三年復為總管大  
業元年廢總管為州又改州為郡聖唐武德元年復為  
總管三年置行臺改為益州以太尉秦王為益州道行  
臺總管又改為大都督府天后析益州置彭蜀漢三州  
開元二年始以齊景冑為劍南節度營田兼姚雋等州  
處置兵馬使自此始有節度使也八年以李潛為使去  
兵馬以章仇兼瓊兼山南西道採訪使其後或兼或不

亦無定制上元二年始分東西川廣德二年復合為一  
大歷二年又分兩川至今不改天寶三載復為大都督  
府十四載玄宗皇帝巡幸車駕留五月至德二年改為  
成都府置尹比東西二京號南京後復停大凡今之推  
名鎮為天下第一者曰揚益以揚益為首蓋聲勢也人  
物繁盛悉皆土著江山之秀羅錦之麗管絃歌舞之多  
伎巧百工之富其人勇且讓其地腴以善熟較其要妙  
揚不足以侔其半況赤府畿縣與秦洛並故非上將賢

相殊勲重德望實為人所歸服者則不得居此况控帶蠻落阨戎限羗非文武寬猛包羅法度之君子則不能得中庸以是聖庭慎擇尤難其任凡使號有三節度觀察安撫先時南蠻六部不相臣服天子有恩賞各頒一詔呼六詔開元末節度使王昱受賄上奏合六為一乃封大酋帥越國公蒙歸義為雲南王始獨稱南詔至楊國忠遙領蜀郡太守兼採訪使遂擾邊閩希立功伐乃有瀘南不利之變貞元中韋令公皋為節帥招復雲南

背蕃歸漢十一月八日置使安撫兼統押西山八國近  
界羌蠻等使是為三使韋令公本以奇勲兼旄鉞思立  
邊効又在鎮且歲久南詔為其用拓地甚遠公既卒劉  
闢繼公後以兵守險為不順誅死家籍沒後京兆杜公  
為節帥酷易軍政殊不以封域為念戍卒罔代邊蠻積  
忿至太和三年十二月蒙嶢巔遂以兵剽掠至城下杜  
公填門不敢與爭會監軍使矯詔宣諭蠻人遂退工巧  
散失良民殲殄其耗半矣列政補完尚不克稱大中六

年四月詔以丞相太原公有駐制羌戎之成績由邠寧  
節度司徒同平章事鎮蜀蜀為奧壤領州十四縣十一  
戶百萬兵士五萬外墁接兩蕃人性勁勇易化以道難  
誣以智公至以儉約帥之以謹廉不伐臨之以刑賞法  
制平治之人歡且舞旦夕詠公之德矣先是西蜀圖經  
甚備朝野之士多寄聲寫錄主茲務者不勝其煩遂盡  
削而潛焚之長吏至即據顯者集為一軸以獻繇是百  
不書一大中八年戶曹參軍蘭弘宗甚好學且目覩司

徒相國之異績願付以傳示于後然不以文自任剪截  
疎長蕪言不畧相國乃屬于小子令刊益之且曰不以  
淹徐疾速歸於流布以為不朽之事求受命震怖又不  
欲以圖經為目乃搜訪編簡目為成都記五卷經與圖  
附益之願終弘宗之職庶以此為助也大中九年八月  
五日叙

續成都記一卷

五代杜光庭著見宋史經籍志

錦里耆舊傳

五代進士張昉著見人物志

續錦里耆舊傳

陳振孫曰前應靈縣令平陽句延慶昌裔撰開寶二年  
秘書丞劉蔚知榮州得此傳其詞蕪穢請延慶修之改  
曰成都理亂記天成後別加編次起咸通九載迄乾德  
乙丑平蜀之後朝廷命令官僚姓名及政事因革以至  
李順王均劉旰作亂之迹皆略載之知新繁縣太常博



士張約序按延慶成都人

蜀程記一卷

五代韋莊著見宋史

華陽記

偽蜀廣政中荷澤院僧仁顯撰古今集記取之

蜀江志十卷 劔南風物錄二十八種

並宋東陽沈立撰慶歷間知洪雅縣事

離峯志十卷

見新編不知作者

梁益志十卷

晁公武曰任弁撰天禧中弁游宦于成都以蜀記數家言皆無據乃引書傳刊正其謬自為序

蜀古今傳

陵州志云宋續耆來守是州暇日作蜀古今傳趙清獻公成都古今集記實撫用之

成都古今集記三十卷

晁氏曰趙抃編抃自慶歷至熙寧凡四入蜀知蜀事為  
詳撫其故實以類相從分百餘門時熙寧七年也自序  
曰僕繇慶歷至今四入蜀凡蜀中利害情偽風俗好惡  
瞭然見之不疑嘗謂前世之士編摭記述不失於疎略  
則失於漫漶不失於鄙近則失於舛雜嚮治平末因取  
續耆舊傳而脩正之去年陳和叔翰林以書見貽俾僕  
著古今集別為一書此固僕之夙心而未有以自發也  
繇此參訪舊老周咨碩生緝以事類成三十卷不始乎

蠶叢而始乎牧誓之庸蜀從經也從經則蠶叢不必書而書之于後何也揚雄紀之吾棄之不可也參取之而已矣事或至於數說何也久論之難詳也昔者齊太公仕於周司馬遷有三說焉疑以傳疑可也神怪死生之事不可以為教書之何也吾將以待天下之窮理者也書亂臣所以戒小人書寇盜所以警出沒書蠻夷所以盡制禦之本末終之以伐蜀使萬世之下知蜀之終不可以苟竊也其間一事一物皆酌考衆書釐正謠謬然

後落筆如關侯墓今荷聖寺闢然有榜而僧仁顯作華陽記云墓在草場廟在荷聖此目擊之所當棄而從之者也若夫知之有未至編之有未及則亦一人之功不可以求備然竊意十得八九矣後之君子其亦有照於斯乎

范百祿序曰成都蜀之都會厥土沃腴厥民阜繁百物浩麗見謂天府縑縷之賦數路取贍勢嚴望偉卓越侔郡朝廷席五聖之厚基萬齡之泰明燭外遐愛均畿輔

凡選建師長必一時名德中外皆曰可然後以尹茲土其優馭西南之意槩古邈矣非獨隆於今也蜀之所以為重於天下雖窮隅鳩舌共知之而其可以文載而久者則往志踏錯近事缺絕殆不足以彰其重熙寧壬子八月詔以參知政事趙公為資正殿大學士再蒞此府蜀之黔黎夙云易擾小異故常必厯上心是時天子方惻然矜之故不憚委公以遠公倍道而來下車之初釐所當恤亟即民心平紛解累人乃說懌盡知明天子覆

育遠方之意甚厚公亦自謂宜於蜀也會翰林學士陳  
公和叔寓之書曰蜀事可觀惜其墜落泯泯不耀公慨  
然留意每政事間隙延多學博識之士與之講求故實  
掇採舊聞若耳目所及參諸長老攷覆是非自開國權  
輿分野占象州部號名因革之別其鎮其浸岡聯派屬  
之詳都城邑郭神祠佛廟府寺宮室學宮樓觀苑囿池  
沼建創之目門閭巷市道里亭館方面形勢至於神仙  
隱逸技藝術數先賢遺宅碑版名氏事物種種瑣謫奇

詭纖嗇畢書繇秦漢已來凡為守令聲聲有風迹者若干人有唐迄今知府事居多閱碩端毅之望又若干人其行事暴於圖史不可勝述其始至若代去之年月序次昭然著矣厥生鉅人千古不乏澤我文化雋乂迭起科選德進相踵于朝數百年間無一遺者物有其善雖毫釐云補實足以為一方盛觀自昔僭賊乘民凶菑事變不同久近亦異悉其致寇之由及王師夷難底平之迹與夫歷世蠻獠叛服不常中國所以驅除羈縻得失



之故又足以為不虞不若之明鑒嗚乎既有政以孚其  
惠又為書以憲厥後公之於蜀可謂志得而道備矣書  
成凡若干篇以類相從為三十卷名曰成都古今集記  
令觀之者信蜀為重於天下非虛也哉

續成都古今集記二十二卷

陳氏曰知府事王剛中居正撰紹興三十年余嘗手寫  
洛陽名園記而題其後曰晉王右軍間成都府有漢時  
講堂秦時城池門屋樓觀慨然遠想欲一遊目其與周

益州帖蓋數致意焉近時呂太史有感於宗少文卧遊之語凡昔人紀載入境之勝錄為一編其奉祠毫社也自以為譙沛真源恍然在目而克之太極嵩之崇福華之雲臺皆將卧遊焉噫嘻弘矢四方之志高人達士之懷古今一也顧南北分裂蜀在境內雖遠患不往爾往則至矣毫克嵩華視蜀猶邇封也欲往其可得乎然則太史之情其可悲也已余近得此記手寫一通與東京記長安河南志夢華錄諸書並藏而時自覽焉是亦卧

遊之意云耳于時歲在己丑蜀故無恙也後七年而有  
虜禍秦漢故迹焚蕩無遺今其可見者惟此二記耳而  
板本亦不可復得矣嗚呼悲夫自昔清獻公刪取張彭  
勾延慶鄭暉盧求周封等書為成都古今集記三十卷  
凡興廢遷徙及城郭官府坊市庫廐儒宮佛室仙館神  
祠陵墓渠堰樓臺池苑之名數與風俗之好惡人物之  
臧否方伯監司之至去蠻夷寇盜之起滅木石之殊尤  
蟲魚之變怪靡不畢載其采獲貫穿亦勤且詳矣自熙

寧訖今凡八十七年事當紀述者蓋難遽數而舊記莫或踵繼見聞異辭日月寢久恐遂湮滅可不惜哉晉陵胡承公嘗命僚屬論次未究端緒尋遷宣撫使事復中輟余來此將周歲蒙國威憲邊堠幸帖息斯民亦安堵如故因以閒隙搜訪纂緝作續記二十二卷前記載古事往往有差誤則辨正之脫遺則補足之清獻所云知之有未至編之有未及者余固不免也其亦有待於後之君子乎

成都古今丙記十卷

宋淳熙制置知府范成大撰自序曰前記趙清獻公作於熙寧七年甲寅凡三十卷蜀之始封及分野梁益州劔南西川成都府屬郡縣得名之所自廢置沿革之不同攷之詳矣後八十七年當紹興三十年庚辰王恭簡公續為之記有辨其差誤附益其未載者二記今皆具存續記之成距今纔十有八年雖事之當書者不至甚夥然恐自是日月寢久來者難考乃蒐耳目所及者繼

書之名曰丙記其二記已載者皆不重出云

成都古今丁記二十五卷

淳熙中制置胡元質長文撰自序曰成都古今記起自熙寧甲寅前帥趙閱道集之凡三十卷後八十七年當紹興庚辰王時亨復為續記二十二卷廢置因革纖悉巨細靡不載也又十有八年當淳熙丁酉范至能復為丙記十卷距時亨日未遠雖不至如前續記之多然二書之所不及者則加詳矣予以是年秋代賈帥蜀四路

兵民之寄實在焉蜀久困於征輸權酷之額雖減鹽茗之課猶重其他邊防民政事所當行利興害去皆有端緒可覆而考也居三年綴為丁記二十五卷粗成一書惟沈黎番部繹騷踰時方定變之所起以迄無事隨宜措畫本末具存姑俟論定別為一編合成都四記而觀之往事頓前得過半矣

蜀人物志

寶謨閣學士劉甲撰甲字師文淳熙進士嘉州人

劔南廣記四十卷

宋龍州助教郭友直撰

宋成都志

慶元中制置使建安袁說友序作者不知為誰按費著云全蜀郡志唯成都志有文類今文類五十卷為袁所集則志必出其手而自序矣

元成都志

至正中費著撰自序曰成都居全蜀上游其名稱自西



漢始按禹貢蜀為梁州之分岷山導江東別為沱今導江與沱名縣鎮於成都此三代而上地志之見于書而不可誣者文王之化行乎江漢之域江有沱詠於二南之先然漢統於江以朝宗沱附於江以起興江首四瀆歷代祠其神於成都故成都為江之源而荆揚之江特其委爾考禹迹聲教之所被稽文王美化之所行徵諸武王邇矣西土之誓言論全蜀而泝源於成都上游之導江則孰有逾於詩書之為可信而有據者哉謂三代

而下秦惠伐蜀而後得與中國通文翁興學於成都而後得與齊魯比不端本於夫子刪定之經惟遷史之言是信亦學者之過也若曰周衰而諸侯叛蜀據阻自安職貢廢而文教弛秦惠伐之而後道路通文翁學而後風化復斯可矣捨詩書斷自秦漢以論蜀則未可也全蜀郡志無慮數十家惟成都志有文類兵餘版燬莫存蜀憲官佐搜訪百至得一二寫本迺參稽訂正僅就編帙凡郡邑沿革與夫人物風俗亦槩可考焉遂鳩工鋟

梓以廣其傳若文類之詳則有待於後之好事者

青城山甲記一卷

晁氏曰偽蜀道士杜光庭賓聖撰集蜀水若山在青城者悉本道家之言

青城山乙記一卷

范仲立撰

岷山異事三卷

宋史句台符撰

永康軍志今灌縣

教授張增編

茂州圖經

郡守史憲序

資中志今資縣

扈自中編李折序

金淵志今金堂縣

郡守韓植序

龍門志今龍安府

楊燾序

龍門續志

宋之源序

陰平縣記今青川所

唐大中六年周茵撰

嘉州志二卷

本志序云宋呂勤為守命張開修義眉志至呂昌朝以

嘉州圖經增廣之為嘉州志二卷

嘉定志

郭公益編

續志

林潔已編

峨眉志三卷

晁氏曰張開撰郡守呂勤命開考圖經及傳記石刻綴緝成書析為十四門宋白吳中復詩文附于後

我眉山記一卷

宋史新編此記次在盧鴻下

榮州圖經今榮縣

隆興元年李燾為守命教官勾演編

武陽志十卷今彭山縣

陳氏曰乾道六年教授葛元鴈著太守廖遜元達序

武陽志二十七卷

何友諒著見宋經籍志

眉州古志

孫汝聽編

通義志二十五卷今眉州

宋經籍志趙善巖著

通義記

家安國編

江鄉志亦眉州

張伯虞編劉光祖序



臨邛志二十卷補遺十卷今邛州

宇文紹奕撰見經籍志

雅安志今雅州

李嗣文序

沉黎志二十三卷今黎州

宋史王寅孫撰

戎州記今叙州府

唐書李仁實撰頓邱人官至左史

叙州圖經三十卷

俞聞中撰見宋史

瀘州地里書

蒲江高載著載為瀘州錄事參軍州守吏部范君委修  
筆削周詳為時所重

江陽志今瀘州

教授李濬序

江陽譜

永嘉曹叔遠編

江州圖經一卷今重慶府

見新編不載作者

江州事迹三卷

宋史經籍志韓昱撰

南平志今南川縣

郡守趙彥邁序

南平郡圖經一卷

失作人名見新編

涪陵記一卷今涪州

宋史云馮忠恕撰

古涪志十七卷

宋經籍志云王寬夫撰

龜陵志今涪州

楊興序

龜陵新志

鄭鑑撰

忠州圖經一卷

新編載失名

南賓志今忠州

樊漢炳序

平都山仙觀記二卷今鄧都縣

見宋經籍志未詳人代

墊江志三十卷今合州

郡守任逢編見宋史

靖南志今榮昌縣

太守黎伯巽序

珍州圖經三卷今遵義府真安州

見宋經籍志失名

夔州圖經

故相國安陽公源乾曜參軍時修

夔舊圖經

李國緯編

夔州圖經四卷

宋經籍志劉德禮撰

夔州志十三卷

新編云馬導撰

通川志十五卷今達州

宋史馬景修著

大寧監圖經六卷

宋史云不知作者

南浦志今萬縣

趙善贛編

萬州新志亦萬縣

王子申序

梁山軍圖經今梁山縣

教授黃震仲編

閬苑新記三十卷今保寧府



新編載王震撰

隆苑記亦保寧府

宋陟丈

閬苑前記

何求丈

閬苑續記

曹無忌丈保寧志云宋閬中何求以宋陟隆苑記疎略  
乃裒次三十卷為閬苑記其後同縣曹無忌又續為二

十六卷其書自元符三年起修至紹興二十五年止

寧武志今廣元縣

鄒鄉序楊炎正編

清化前志今巴州

教授劉甲編

清化續志

教授李鈞編

果州圖經五卷今順慶府

見宋史無作者名

開漢志亦順慶府

郡守朱繁序云紀將軍信加封詔詞有云實開漢業故  
建樓命名曰開漢郡志名編亦曰開漢

廣安志

嘉定改元郡守廖唐英序

宕渠志二卷亦廣安州

無編集人姓名及郡守題名仙釋詩文等類

蓬州志五卷

秘書少監劔門羅疇疇老撰凡十五門崇寧四年序

梓潼古今記今潼川州

淳熙間鄴令孫汝聽作

梓潼風俗譜

元祐間教授石慶嗣作

新潼川志

劉甲序

潼川府圖經十一卷

宋史新編袁觀撰

遂寧志

馬崇文序

普慈志三十卷今安岳縣

宋郡守楊泰之撰青神人

西南夷事狀二十卷 西戎記二卷

並唐韋準撰

西南備邊錄十三卷

陳氏曰唐宰相李德裕文饒太和中鎮蜀所作錄內州縣城鎮兵食之數大畧具焉

李巽岩曰今存者只一卷與崇文總目相符豈嘉祐以前已亡逸乎德裕之深謀遠慮雖至今可用也而所存止此可惜

西南備邊志十二卷

陳氏曰嘉定進士鄧嘉猷撰紹興末犍為有蠻擾邊初

莫知其何種族也已而有能別識其為虛恨蠻者時蜀  
邊久無事既去而朝廷憂之詔有司經度嘉猷取秦漢  
以來訖于本朝凡史傳所載蠻事皆著于篇時乾道中  
也其為志九為圖一

邊和錄五卷

陳氏曰承議郎河東陳伯彊撰載胡世將承公宣撫川  
陝事

西南條著

趙瞻著瞻知威州以威茂雜羣獠險而難守不若合之而建郡于汶川條著其詳為書後熙寧中經理西南就瞻取其書考焉

益部方物畧記

宋端明殿學士吏部侍郎知益州安陸宋祁子京撰序曰益為西南一都會左阻劍門右負夷番內坦夷數百里環以長江裹以複岑川陸盛氣礙而不得東迴薄蜿蜒還負一方為珍木為怪草為鳥魚芋稻之饒日暘雨



雨噓和吐妍層出雜見不可勝狀殆岷精縕靈示完富  
瓌瑈於茲壤也嘉祐建元之明年予來領州得東陽沈  
立所錄劔南方物二十八種按名索實尚未之盡故遍  
詢西人又益數十物列而圖之物為之贊圖視狀贊言  
生之所以然更名益部方物畧記凡東方所無及有而  
自異皆取之異禪風土聚邱之遺云

三川官下記二卷

宋敏求撰見宋史經籍志

續東京至益州地里圖若干卷

宋史李常著常字公擇東坡友也

峽程記一卷

五代韋莊撰見宋史

峽山履平集一卷

司馬儼撰見宋經籍志

峽山利涉集一卷

潘子韶著見宋史

蜀北路秦程記一卷

宋史陳延禧撰

吳船錄一卷

范成大至能撰公自蜀帥東歸紀遊取門泊東吳萬里  
船之句為名

蜀中廣記卷九十六

欽定四庫全書

蜀中廣記卷九十七

明 曹學佺 撰

著作記第七

集部

蜀國文英八卷

王蜀嘉州司馬劉贊編見宋經籍志

成都文類五十卷

宋慶元中制置使建安袁說友編其自序曰天地之祕  
藏發而為名山大川山川之秀靈歛而為文章華藻二  
者相為頡頏而光明焉者也兩京三都之賦摹寫天地  
繪繡山川絢道德挾天庭潤金石諧韶濩與乾坤造化  
周流盛大於宇宙之間千百世而下知有兩京三都者  
以此文也然則天地山川而可無此文哉而可以不傳  
此文哉益故大都會也有江山之雄有文物之盛奇觀  
絕景僊游神跡一草一木一邱一壑名公才士騷人墨

客窺竒吐芳聲流文暢散落人間何可一二數也凡此  
者予來三年亦既畧睹矣或曰兩京三都以賦而傳使  
無傳焉斯文泯矣然則繇漢以來其文以益而作者今  
獨無傳可乎有益都斯有此文此文傳益都亦傳矣爰  
屬寮士摭諸方策裒諸碑識流傳之所膾炙友生之所  
見聞大篇雄章英詞綺語折法度極炫耀其以益而文  
者悉登載而彙輯焉斷自漢以下迄於淳熙其文篇凡  
一千有奇類為十一目釐為五十卷益之文於茲備矣

嗟乎後世之士豈無浮沆湘由巴蜀作史記如司馬子  
長者乎豈無上瞿唐過夔梓賦雪錦如杜少陵者乎又  
豈無自西蜀歷荆楚棲遲山水間如田游巖者乎儻復  
得如二三公者而訪斯益孽斯文焉則知清寧闔闢至  
大至廣之內而有所謂蜀蜀六十州亘五千里之內而  
有所謂益益都無量江漢炳靈之內而有所謂文者其  
不在此書乎是書也而有傳焉庶幾乎無負於益矣

固陵集二十卷



宋廣都費士幾達可著嘉定中為夔守編集管內山川  
建置碑文記頌為二十卷多半夔門之書在旁縣者十  
之二三

成都古今詩集六卷

章綵編人代未詳出宋史經籍志

嘉定詩

王象之輿地碑目云岑參為嘉州時編

漢司馬相如集二卷

後人取其上林賦難蜀父老文及封禪頌諸作編輯為  
上下卷今刻在漢魏叢書

文心雕龍曰相如含筆而腐毫上林繁類以成艷又云  
相如之難蜀父老文曉而喻博有移櫟之骨焉又云相  
如封禪蔚為倡首爾其表權輿序帝王炳玄符鏡鴻業  
駢前古於當今之下騰休明於列聖之上歌之以禎瑞  
贊之以介邱絕筆茲文固維新之作也

王子淵集

王褒字子淵資中人漢書益州刺史王褒使褒作中和樂職詩以宣風化因薦之於朝詔徵褒獻聖主得賢臣頌宣帝嘉之令待詔備歌頌數從行幸受賜為多褒嘗作洞簫頌元帝為太子時令後宮貴人皆誦讀之又徵時客前上戲為僮約一篇劉勰云王褒髯奴券之楷也

楊子雲集五卷 別傳一卷

晁氏曰古無雄集宋譚愈好雄文患其散在篇籍離而不屬因綴繹之得四十餘篇又云從父詹事公以道雜

取諸書所載雄逸事為一編系之以贊文心雕龍曰子雲屬意辭人最深觀其涯度幽遠搜選瑰麗而竭才以鑽思故能理贍而辭堅矣

反離騷一章

漢書雄每作賦嘗擬司馬相如以為式又怪屈原文過相如至不容作離騷自投江而死迺作書往往撫離騷文而反之自崦山投諸江流以弔屈原名曰反離騷又旁離騷作重一篇名曰廣騷又旁惜誦以下至懷沙一

卷名曰畔牢愁畔牢愁廣騷文多不載獨載反離騷

二十四箴一卷

雕龍云子雲稽古始範虞箴晁氏曰今廣德所刊本校集中無司空尚書博士太常四箴集中所有皆據古文苑而此四箴或云崔駰或云崔瑗疑不能明

演連珠一卷

雕龍云揚雄覃思文潤業深綜述碎文璣語肇為連珠其事雖小而明潤矣

漢何汶集

汶郾縣人何英之孫也集有世務三十篇

李伯仁集二卷

李尤字伯仁廣漢雒人也少以文章顯漢和帝時侍中賈逵薦尤有相如揚雄之風召詣東觀受詔作賦拜蘭臺令史安帝時稍遷為諫議大夫受詔與謁者僕射劉珍等同撰漢記後帝廢太子為濟陰王尤上書諫爭順帝立遷樂安相年八十三卒所著詩賦銘誄頌七歎哀

典凡二十八篇尤同郡李勝亦有文才為東觀郎著詩  
誄頌論數十篇

文章流別云李尤自山河都邑至於刀筆竿契莫不有  
銘

李密述理論十篇

晉書密字令伯犍為武陽人治春秋左氏傳博覽多所  
通涉皇甫士安雅善之

玄鳥賦

密長子賜少能屬文作玄鳥賦舉秀才為汶山太守

龔壯邁德論

晉書壯字子偉巴西人潔已自守與鄉人譙秀齊名以父叔為李特所害終身不至成都惟研考經典覃思文章每歎中夏多經學而巴蜀鄙陋兼遭李氏之難無復學徒乃著邁德論文多不載

何妥文集十卷

隋書妥字棲鳳郫縣人傳稱又著孝經義疏二卷



陳子昂文集十卷

別傳曰子昂字伯玉梓州射洪人始以豪家子馳俠使氣至年十七八未知書嘗從博徒入鄉學慨然立志因謝絕門客專精墳典數年之間經史百家罔不該覽尤善屬文雅有相如子雲風骨年二十一以進士對策高第文明初上書帝覽而異之勅曰梓州人陳子昂地籍英靈文稱偉曄可麟臺正字時洛中傳寫其書市肆間巷吟諷相屬乃至轉相貨鬻飛馳遠邇拜右拾遺卒年

四十二其文章散落多得之於人口今所存者十卷嘗著江上丈人論將磅礴化機而與造物者遊遭家難亡之故人范陽盧巖用集其遺文為序傳識

柳宗元撰楊評事文集後序略云文有二道辭令褒貶本乎著述者也導揚諷諭本乎比興者也著述者流出於書之謨訓易之象系春秋之筆削其要在於高壯廣厚詞正而理備謂宜藏於簡冊也比興者流蓋出於虞夏之詠歌殷周之風雅其要在於麗則清越言暢而意

美謂宜流於謠誦也茲二者考其旨義乖離不合故秉  
筆之士恒偏勝獨得而罕有兼者焉厥有能而專美命  
之曰藝成雖古文雅之盛世不能並肩而生唐興以來  
稱是選而不作者其梓州陳拾遺乎

閻邱均集

均成都人唐初與杜審言齊名為安樂公主所薦起家  
太常博士公主被誅均坐貶循州司戶卒其孫閻邱師  
與杜甫通家來往

李義府集三十卷

唐書義府本瀛州饒陽人其祖為射洪縣丞因家於永泰今之鹽亭也嘗獻承華箴見文部

李翰林集二十卷一云草堂集

晁氏曰李白集舊十卷唐李陽冰序咸平中樂史別得白歌詩十卷凡七百七十六篇又纂雜著為別集十卷宋次道治平中得王文献及唐魏萬所纂白詩又裒唐類詩洎石刻所傳者通陽冰樂史集共一千一篇雜著

六十五篇曾子固乃考其先後而次第之云白蜀人天寶初至長安明皇召為翰林供奉頃之不合去安祿山反明皇在蜀永王璘節度東南白時卧廬山迫致璘敗坐繫潯陽獄崔渙宋若思驗治白以為罪薄釋白囚使謀其軍乾元元年終以璘事長流夜郎遇赦得釋過當塗以卒始終更涉如此此白之詩所自序可考者也舊史稱白山東人為翰林待詔又稱白在宣城謁見永王璘遂辟為從事而新書又稱白流夜郎還潯陽坐事下

獄宋若思釋之者皆不合於白之自序蓋史誤耳予按杜甫詩亦以白為山東人而蘇子瞻嘗恨白集為庸俗所亂則白之自序亦未可盡信而遂以為史誤近蜀本又附入左綿邑人所裒白隱處少年所作詩六十篇尤為淺俗白天才英麗其辭逆蕩雋偉飄然有超世之心非常人所及讀者自可別其真偽也

唐宣州當塗令李陽冰序云李白字太白隴西成紀人梁武昭王暉九世孫蟬聯珪組世為顯著中葉非罪謫

居條支易姓與名然自窮蟬至舜五世為庶累世不大  
耀亦可歎焉神龍初始逃歸於蜀之彰明復指李樹而  
生伯陽驚姜之夕長庚入夢故生而名白以太白字之  
世稱太白之精得之矣不讀非聖之書耻為鄭衛之作  
故其言似天仙之辭凡所著述言多諷喻自三代以來  
風騷之後馳驅屈宋鞭撻揚馬千載獨步唯公一人故  
王公趨風列岳結軌羣賢翕習如鳥歸鳳盧黃門云陳  
拾遺橫制頽波天下質丈翕然一變而今朝詩體尚有

梁陳宮掖之風至公大變掃地併盡今古文集遇而不  
行唯公文章橫被六合可謂力敵造化歟天寶中明皇  
下詔徵就金馬降輦步迎如見綺皓坐之七寶牀御手  
調羹以飲之謂曰卿是布衣名為朕知非素蓄道義何  
以及此置於金鑾殿出入翰林中問以國政潛草詔誥  
人無知者醜正同列害能成謗格言不入帝用疎之公  
乃浪跡縱酒以自昏穢詠歌之際屢稱山東人與賀知  
章崔宗之等號為八仙時又稱公為謫仙朝列賦謫仙



之詞凡數百首多言公之不得意天子知其不可留乃  
賜金歸之遂就陳留採訪使彥允請北海高天師授道  
籙於齊州紫極宮將東歸蓬萊訪羽人駕丹邱耳陽冰  
試絃歌於當塗心非所好公遐不我棄乘扁舟而相顧  
臨當挂冠公又疾亟草藁萬卷手集未修枕上授簡俾  
令為序論關雎之義始愧卜商明春秋之詞終慚杜預  
自中原有事公避地八年當時著述十喪八九今所存  
者皆得之他人焉時寶應元年十一月乙酉也

前進士魏顥序云自盤古劃天地天地之氣艮於西南  
劔門上斷橫江下絕岷峨之曲別為錦川蜀之人無聞  
則已聞則傑出是生相如君平王褒揚雄降有陳子昂  
李白皆五百年矣白本隴西缺放形因家於綿身既生  
蜀則江山之英秀也伏羲造書契後文章濫觴者六經  
糟粕離騷糠粃建安七子七子至白中有蘭芳情理宛  
約詞句研麗白與古人爭長三字九言鬼出神入瞪若  
乎後耳白久居峨眉與丹邱子因持盈法師達白亦因

之入翰林名動京師大鵬賦詩家藏一本故賓客賀公  
奇白風骨呼為謫仙子由是朝士作歌數百篇上皇豫  
游召白時為貴門邀飲比至半醉令製出師詔不草而  
而成許中書舍人以張垍讒逐游海岱間年五十餘尚  
無祿位祿位拘常人橫海鷗負天鵬豈池籠榮之顯始  
名萬次名炎萬之日不遠命駕江東訪白游天台還廣  
陵見之眸子炯然哆如餓虎或時束帶風流醞藉曾授  
道籙於齊有青綺冠帔一副少任俠手刃數人與友自

荆徂揚路亡權寔迴棹方暑亡友糜潰白收其骨江路  
而舟又長捐韓荊州延飲白誤拜韓讓之白曰酒以成  
禮荊州大悅白始娶於許生一女一男男曰明月奴女  
既嫁而卒又合於劉劉訣次合於魯一婦人生子曰頗  
黎終娶於宋門携昭陽金陵之妓迹類謝康樂世號為  
李東山駿馬美妾所適二千石郊迎飲數斗醉則奴丹  
砂撫青海波滿堂不樂白宰酒則樂顥平生自負人或  
為狂白相見混合有贈之作謂余爾後必著大名於天

下無忘老夫與明月奴因盡出其文命顥為集顥今登  
第豈符言耶解携明年四海大盜宗室有某者白陷焉  
謫居夜郎罪不至此屢經昭洗朝廷忍白久為長沙汨  
羅之儔路遠不存否極則泰白宜自寬吾觀白之文義  
有濟代命然千鈞之弩魏王大瓠用之有時議者柰何  
以白有叔夜之短儻黃祖過禰晉帝罪阮古無其賢所  
謂仲尼不假蓋於子夏也經亂離白章句蕩盡上元末  
顥於絳偶然得之沉吟累年一字不下今日懷舊援筆

成序首以贈顥作顥酬白詩不忘故人也次以大鵬賦  
古樂府諸篇積薪而錄文有差互者兩舉之白未絕筆  
吾其再刊付男平津子掌其他事跡存於後序

李太白藁書跋云藁書世傳李太白遺文或謂謝氏子  
弟誑武功蘇才元所書更不復詳考所出而推與過重  
便謂不減魯公然此書雖少繩墨不可考以法度要是  
軒前輟後度越陵突令人想見酒酣賦詩時也王僧虔  
論書或以其人可想或以其法可存世人愛李太白名

至偽書一卷亦聲價增重豈以其人可想故耶

朱巨川集

唐朱灣字巨川西蜀人貞元元和間為府從事高仲武  
間氣集云朱君率履貞素放情江湖郡國交徵潛耀不  
起有唐高人也詩體清逸興用宏深因詞寓意放詠尤  
工

符載集十卷

唐符載字厚之岐襄人幼有宏達之志隱居廬山聚書

萬卷不為章句學貞元中李巽江西觀察薦其才授奉  
禮郎為南昌軍副使繼辟西川韋臯掌書記歷監察御  
史元和中卒段文昌為墓志附於後集皆雜文末篇數  
詩而已集前有崔羣王湘送符處士歸覲序皆云載蜀  
人以比司馬王揚云

雍陶集十卷

陶字國鈞成都人太和中進士為簡州刺史有詩名見  
詩話



李遠集一卷

唐建州刺史雲陽李遠求古撰太和五年進士終御史中丞有集傳

唐求集一卷

唐嘉州處士唐求與顧非熊齊名詳見詩話

孫光憲鞏湖編玩三卷 荆臺集四十卷 筆

傭集十卷

光憲字孟文陵州人王衍降唐避地荆南高從誨辟掌

書記三世皆在幕府歸宋授黃州刺史在郡有聲乾德  
中卒光憲博通經史聚書數千卷或自抄寫孜孜讎校  
老而不廢好著撰自號葆光子所著荆臺集華湖編玩  
筆傭集橘齋集北夢瑣言蠶書又撰續通歷紀事頗失  
實太平興國初詔毀之

阜江漁翁集

後唐張立著立新津人少博學尤長詩什隱居山谷中  
孟蜀明德間詔赴闕立詐病不就先是知詳入蜀中外

騷動明宗頗以蜀人為疑凡有勢力貲產之族悉遣入洛立嘗為詩諷曰朝廷不用憂巴蜀稱霸何曾是蜀人宰相李昊聞而重之復薦於昶亦托病不就有詩數百篇號阜江漁翁集行世後徙居雙流唐英商英皆其孫也

梓潼集二十卷

五代李堯夫著詳見詩話

玉壘集十卷

唐僧可朋著丹稜人

煙花集五卷

蜀後主王衍集艷詩二百篇且為之序

三家宮詞三卷

唐王建蜀花藥夫人宋丞相王珪三人所著

花藥夫人詩一卷

青城費氏女詳見詩話

蜀中廣記卷九十七